

Visoki predstavnik produžio mandat Nezavisne sudske komisije i Visokih sudskih i tužilačkih vijeća

Visoki predstavnik Paddy Ashdown je protekle sedmice produžio mandat Nezavisne sudske komisije (IJC) kao i prelazni period Visokih sudskih i tužilačkih vijeća (Vijeća). Produženi mandat će trajati do 31. marta 2004. godine. Do ovog datuma će IJC i Vijeća završiti proces ponovnog imenovanja svih sudija i tužilaca u Bosni i Hercegovini, spojiti tri postojeća Vijeća u jedinstveno Sudsko i tužilačko vijeće BiH i imenovati stalni sekretarijat istovremeno radeći na zatvaranju IJC-a.

Osnovni zadatak tri Vijeća tokom prelaznog mandata je ponovno imenovanje oko 1.000 sudija i tužilaca na njihove funkcije isključivo na osnovu kvalificiranosti. Vijeća će okončati ovaj proces ponovnog imenovanja do 31. marta 2004. godine. Vijeća će i dalje biti odgovorna za vođenje disciplinskih postupaka protiv sudija i tužilaca i dalje će vršiti imenovanja na upražnjena mjesta.

Premijeri entiteta i Ministarstvo pravde BiH trebaju potpisati sporazum kojim se nadležnost za sudstvo prenosi na jedinstveno Vijeće na državnom nivou u skladu sa Ustavom BiH. Ovaj sporazum će podrazumijevati da će Visoko sudsko i tužilačko vijeće biti u potpunosti operativna institucija BiH, nezavisna od političkih uticaja.

Ministarstva pravde na nivou entiteta i države pripremaju nacrt zakona za uspostavljanje jedinstvenog Vijeća uz savjetodavnu pomoć OHR-a i IJC-a. Ovaj zakon će biti proslijeđen u parlamentarnu proceduru na usvajanje. Visoko sudsko i tužilačko vijeće BiH će 1. aprila 2004. godine

preuzeti aktivnosti tri postojeća vijeća. Uspostavljanje Visokog sudskog i tužilačkog vijeća praktično će biti spajanje tri postojeća vijeća.

Odjeljenja iz postojeće strukture IJC-a će biti spojena u sekretarijat stalnog Visokog sudskog i tužilačkog vijeća kako bi se osigurao neometan prelaz u domaću instituciju koja će početi sa radom 1. aprila 2004. godine.